

3-нджи хутбе

Аллаһу Та'ала Къур'ан-и Керимде «Ан-Ниса» суресининъ 48-инджи аетинде шойле буюра:

Манасы: «Аллаһ, озюне ортакъ къошкъанларны, яни куфюр ичинде ольгенлерни багъышламаз, куфюрден башкъа гунаһларыны истедиги кимселерге багъышлар».

Сайгъылы мусульманлар!

Аллаһнынъ къуллары узеринде чокъ хакълары бардыр. Бу хакъларнынъ энъ буюги ве энъ устюни – Аллаһкъа иман этип, ич бир шей ортакъ къошмамаларыдыр. Аллаһтан башкъа ич кимсе ибадетке ляйыкъ дегильдир. Бизни яраткъан ве бизлерге ниметлер берген – О'дыр. Аллаһкъа ве Пейгъамберине инанмамакъ куфюрдир. Ким Аллаһкъа ве Пейгъамберине къаршы чыкъып иман этмесе, о энъ хайырлы амельни гъайып эткен олур. Имам Бухарининъ ривает эткен бир хадис-и шерифте Пейгъамбер Эфендимиз шойле буюра:

Манасы: «Амеллернинъ энъ устюни – Аллаһкъа ве Ресулюне иман этмектир».

Иманы олмагъан инсаннынъ амеллери къабул олунмаз. Салих амеллернинъ къабул олунмасы ичюн иман – шарттыр.

Аллаһу Та'ала «Ан-Ниса» суресининъ 124-нджи аетинде шойле буюра:

Манасы: «Иманлы оларакъ, эркек олсун, къадын олсун, салих амель япкъан олса, иште, олар Дженнетке кирерлер».

Ким озюне ширкнинъ я да куфюрнинъ чешитлеринден бирисини къабул этсе, озь нефсини Дженнетге азырлагъан олур ве ахиретте ярамай бир яшайышны сечкен олур.

Ким къяфир олып ольсе, о, Аллаһнынъ магъфиретине наиль олмайджагъыны Аллаһу Та'ала бизге Къур'ан-и Керимде буюрды. Ширк я да куфюр чешитлеринден бирисини ишлеген алда ольген инсанны Аллаһ багъышламайджакътыр. Мисаль ичюн, куфюр чешитлеринден, Аллаһтан башкъасына ибадет этмек, Аллаһнынъ барлыгъыны инкяр этмек, Аллаһны сёгмек ве Шериятны мыскъылламакъ киби аркетлер – Аллаһнынъ багъышламайджагъы шейлердир.

Аллаһу Та'ала «Мухаммед» суресининъ 34-нджи аетинде шойле буюра:

Манасы: «Иман этмейип, башкъаларнынъ Исламгъа кирмесине къаршы чыкъып, сонъра куфюр ичинде ольгенлерни Аллах афф этмез».

Аллахкъа ве Ресулюне иман эткен инсан, буюк гунаһлар ишлеп тевбе этмеден ольген олса да, Аллахнынъ истегине къалыр: Аллах истесе афф этер, истесе джезасыны берер, сонъра Дженнетке кирдирир. Гунаһкяр мусульман не къадар гунаһ ишлесе, къафир оламаз, о къафирден устюндир. Бин Исраиль мусульманларындан зинакяр бир къадын бир кунь къую башында пек сувсагъан копекни корип, аякъкъабыны чыкъарды ве онен сув алып копекни ичирди. Бу амелинден Аллах оны багъышлагъаныны Пейгъамбер Эфендимиз сейлеген эди. Аллах чокъ мерхаметлидир, амма азабы да чокъ шиддетлидир. Аллах бизге чокъ ниметлер берген. Бу ниметлер ичюн О`нъа хамд этип, гунаһ ишлемейик.

Сайгъылы мусульманлар!

Буюк гунаһ ишлеп, тевбе этмеден ольген мусульманлар экиге айырылырлар. Биринджи къысым, бу – ишлеген гунаһлары ичюн джезагъа ляйыкъ олгъанлары алда, Аллаху Та`аля оларны багъышлар ве озь рахмети иле Дженнетке кирдирир. Экинджи къысым, Аллах оларны атеште азапландырыр, сонъра чыкъарып, оларны Дженнетке кирдирир. Имам Бухари ривает эткен бир хадис-и шерифте Пейгъамбер Эфендимиз буюрды: «Къальбинде зерре къадар иманы олып, «ля иляһе илляллаһ» деген Джеһеннемден чыкъаджакътыр».

Аллахкъа ве Ресулюне иман эткен эр бир киши, Джеһеннем азабыны чексе я да чекмесе де, эп бир Дженнетке киреджек. Гунаһлар ичюн азап чеккен мусульман эбеди оларакъ Джеһеннемде къалмайджакъ. Джеһеннемде эбедий къаладжакъ – къафирлердир. Энь шиддетли ве телюкели гунаһ – куфюрдир, къафирлернинъ джезасы исе чокъ агъырдыр. Сайгъылы мусульманлар! Бу арада сизлерни бир аетнинъ янълыш ачыкъламасындан сакъындырмагъа истейим. Аллаху Та`аля «Ан-Ниса» суресининъ 93-нджи аетинде шойле буюра:

Манасы: «Ким бир мусульманни иманы ичюн ольдюрсе, [онынъ] джезасы – эбедий къаладжакъгы Джеһеннемдир».

Имам Аль-Гъазали ве башкъа муфессирлер бу аетнинъ тефсиринде бойле сейледилер: «Ким бир му`минни иманы ичюн ольдюрсе, яни мусульман олгъаны ичюн ольдюрсе, о къафир олур ве бу алда ольсе, джезасы – эбедий Джеһеннем оладжакътыр. Амма бир мусульман башкъа мусульманни хакъсыз ерде ольдюрсе я да озюни ольдюрсе, бу киши буюк гунаһкярдыр, Джеһеннемде эбедий къалмаджакътыр».